

# Scéal, Scéal, Scéal...



10 Lúnasa 2023 || Eagrán 159

*Scéilíní, nuaíocht agus fógraí as Cois Fharraige.*

## *Nóta ón Oifigeach Pleanála Teanga*

**Ba mhaith linn focal buíochais a ghabháil le pobal Chois Fharraige as ucht an tacaíocht agus cúnamh a thugtar don Fhóram i gcónaí. Tá Plean Teanga Chois Fharraige á chur i bhfeidhm le breis agus trí bliana anuas anois agus níl aon amhras ach go bhfuil ról suntasach ag muintir na háite sa phróiseas sin. Is pointe eolais agus foinse taitnimh é *Scéal Scéal Scéal...* agus ba bhreá linn dá mbeadh ionchur ag an bpobal ann. Tá muid i gcónaí ag iarraidh a chloisteáil uaibh - agus aon mholtaí atá agaibh a chloisteáil agus a phlé. Ar scáth a chéile a mhaireann muid, ar ndóigh!**



# OCPT AG TEASTÁIL!

Tá folúntas in oifigí Fhóram Chois Fharraige um Pleanáil Teanga ó d'aistrigh Aoife Ní Chonghaile chuig a cuid cúraimí nua le hEalaíon na Gaeltachta, mar sin tá oifigeach cúnta nua le ceapadh. Beidh an té a cheapfar ag obair i gcomhar leis an Oifigeach Pleanála Teanga Katie Ní Loingsigh, le tacú léise agus le Bord Stiúrtha an Fhórait Plean Teanga Chois Fharraige a chur chun cinn. D'fheilfeadh an post seo do dhuine fuinniúil, spreagúil, cruthaitheach a bhfuil an-eolas aige/aici ar shaol na Gaeilge agus na Gaeltachta. Ní mór don té sin ardchaighdeán Gaeilge, idir labhairt agus scríobh a bheith aige/aici dar ndóigh, chomh maith le cleachtadh ar a bheith ag obair i bpáirt le daoine eile le tograí a chur i gcrích. Ba mhór an buntáiste taithí ar chúrsaí idirlín, meáin shóisialta agus cúrsaí cumarsáide. Conradh trí bliana, ar féidir cur leis, atá i gceist. In oifigí an Fhórait i sráidbhaile an Spidéil a bheas an té seo lonnaithe ach beidh sí/sé amuigh go rialta i measc an phobail i gCois Fharraige ar fad ó Ros a' Mhíl go dtí na Forbacha ag tacú le grúpaí agus le heagrais atá ag cur bearta agus imeachtaí an Fhórait chun cinn. Is féidir tuilleadh sonraí faoin bpost a fháil ach glaoch ar 086-2732279 nó scríobh chuig [ptchoisfharraige@gmail.com](mailto:ptchoisfharraige@gmail.com) Is é an 21 Lúnasa 2023 an spriocdháta le cur isteach ar an bpost. Is féidir teacht ar an bplean teanga ag [www.coisfharraige.ie](http://www.coisfharraige.ie)



Folúntas

**Oifigeach Cúnta Pleanála Teanga**

# DRÁMAÍ RAIDIÓ 'GAELPRO'

Beidh dhá dhráma raidió Gaeilge nua á chraoladh go luath. Is faoin tionscadal GaelPro Raidió (Seirbhís eolais dhigiteach atá á soláthar ag An tOireachtas do stáisiún phobail & thráchtála) agus le tacaíocht ó Choimisiún na Meán atá na drámaí seo á scríobh, á léiriú agus á soláthar. Is duaisiarrachtaí de chuid Chomórtais Liteartha an Oireachtais 2022 iad na drámaí. Ina measc tá; 'Póilíní Móna' le Gabriel Rosenstock a chraolfar ar an 16 Lúnasa; 'An Robálaí' le Ray Mac Mánais a bheas le cloisteáil ar an 23 Lúnasa agus 'Bíobla don Bheirt Againn' le Majella Ní Dhomhnaill a craoladh ar an 9 Lúnasa. Is é an drámadóir agus scríbhneoir, Cathal Póirtéir a léirigh na drámaí seo agus bhí buíon iomráiteach aisteoirí rannpháirteach sa tionscadal, ina measc, Diarmuid de Faoite, Sinéad Ní Uallacháin, Áine Ní Dhroighneáin agus Eoghan Mac Giolla Bhríde. Craolfar na drámaí ar an stáisiún pobail, Phoenix FM (92.5), a bhuaigh Gradam Chumarsáide an Oireachtais do 'Chlár Gaeilge na Bliana ar Stáisiún Pobail' i 2022.

## TAISPEÁNTAS CHOIS FHARRAIGE 2023

Beidh Taispeántas Chois Fharraige na bliana seo ar siúl ar an Domhnach 3 Meán Fómhair. Is iomaí comórtas a bheas ar siúl le linn an Thaispeántais - le cúrsaí grianghrafadóireachta, ealaíne agus ainmhí san áireamh. Is féidir foirm iarratais do na comórtais a fháil ó Thigh Slemon, sna Forbacha, Texaco sa Spidéal agus ag an gComhar Creidmheasa in Indreabhán. Glacfar le hiarratais go dtí 30 Lúnasa. Le tuilleadh eolais, moltar súil a choinneáil ar an gcuntas Facebook: 'Taispeántas Chois Fharraige'.


# BIG MAGGIE AG AN TAIBHDHEARC

Beidh 'Big Maggie' á léiriú sa Taibhdhearc ar an 15 & 16 Meán Fómhair. Léiriú de chuid Cumann Drámaíochta Chois Fharraige atá ann, do scéal cáiliúil John B Keane, atá aistrithe go Gaeilge ag Bridie Ní Churraoin. Léiríodh Big Maggie i mí Márta na bliana seo i Sheanscoil Sailearna agus d'éirigh go hiontach leis. Tá costas €15 ar thicéad agus cuirfear tús leis an seó @ 8i.n. Is féidir ticéad a cheannach ar líne nó is féidir teagmháil a dhéanamh leis an Taibhdhearc ag 091 399277 le ticéad a cheannach nó le breis eolais a fháil.



# MO MHÁLA LEABHARLAINNE BEAG

Tá an scéim 'Mo Mhála Leabharlainne Beag' ar ais arís i mbliana le cúnamh agus tacaíocht a thabhairt do ghasúir na hÉireann agus iad ag tabhairt aghaidh ar an scoil don chéad uair. Scéim de chuid Leabharlanna na hÉireann atá ann le suim agus grá na léitheoireachta agus na litríochta a spreagadh i measc an aosa óg, agus tá na málaí ar fáil saor in aisce, ó do leabharlann áitiúil. Le dul in éineacht leis an mála, do thuismitheoirí nach bhfuil Gaeilge líofa acu, tá gluaiseanna ar fáil freisin. Le níos mó eolais a fháil is féidir cuairt a thabhairt ar do leabharlann áitiúil.



# SORCAS LE CROÍ

Tá Sorcas le Croí landáilte i gCois Fharráige! Tá an puball sorcais nua lonnaithe ar an bpáirc ag Scoil Sailearna. Is meascán den chéad scoth é Sorcas le Croí idir taispeántas sorcais agus ceol traidisiúnta beo – taithí go hiomlán as an nua bunaithe ar thraidisiún, cultúr agus oidhreacht na Gaeltachta. Taispeántas go hiomlán trí mheán na Gaeilge atá ann le béim ar thábhacht na Gaeilge i réimse na healaíona. Tá Sorcas le Croí ar siúl go dtí 13 Lúnasa, le dhá seó in aghaidh an lae (4:30 agus 7:30). Is féidir leis an sorcas freastal ar ghrúpaí chomh maith ach teagmháil a dhéanamh le Jane ag [jane@broken-theatre.ie](mailto:jane@broken-theatre.ie) Is féidir ticéid a chur in áirithe agus níos mó eolais a fháil ar an suíomh idirlín: [www.broken-theatre.ie](http://www.broken-theatre.ie)



# H3 LÚNASA

**AN PHÁIRC @ SCOIL SAILEARNA**

**Dé Luain - Dé hAoine 4:30 + 7:30**

**Dé Sathairn & Dé Domhnaigh 2 + 5 i.n.**


**Ticéad: €15 ([www.broken-theatre.ie](http://www.broken-theatre.ie))**

**BROKEN  
THEATRE**

# SORGAS LE GROÏ



Údarás na  
Gaeltachta



# FOLÚNTAS AG POTA

Tá POTA sa tóir ar dhuine fuinniúil agus díograiseach le bheith mar chuid dá bhfoireann mar bhainsteoir urláir. Táthar sa tóir ar dhuine a chuirfidh le heispeiréas a gcuid custaiméirí agus a chabhróidh leis an bhfoireann an freastail a dhéantar orthu a fhorbairt agus a fheabhsú. Uaireanta lae atá i gceist agus beidh tuarastal iomaíoch ar fáil, ag braith ar thaithí. Is féidir teagmháil a dhéanamh le [potacafe@gmail.com](mailto:potacafe@gmail.com) le tuilleadh eolais a fháil faoin bhfolúntas.




## CLUB SCRÍBHNEOIREACHTA CHOIS FHARRAIGE

Cuirfear tús le Club Scríbhneoireachta i gCois Cuain, sa Spidéal go luath. 'Sí Máire Uí Dhufaigh a bheas á threorú. Tá fáilte roimh scríbhneoirí nó daoine le suim acu sa scríbhneoireacht, atá ag iarraidh níos mó a fhoghlaim faoi, cúrsaí cruthaitheacha a phlé agus scéalta a roinnt ar bhealach sóisialta agus taitneamhach. Cuirfear tús le cúrsaí ar an 13 Meán Fómhair @ 7:30 Is féidir níos mó eolais a fháil ó Mháire ag 086 822 0272.

## AISTEOIRÍ AG TEASTÁIL

Tá aisteoirí ag teastáil do shiút a bheas ar siúl i mí Dheireadh Fómhair agus Nollaig i nDún na nGall. Tá an comhlacht léirúcháin ag iarraidh cloisteáil ó aisteoirí de gach aois agus inscne. Níl taithí aisteoireachta riachtanach. Le suim a léiriú is féidir teagmháil a dhéanamh le [aine@aineosullivancasting.com](mailto:aine@aineosullivancasting.com) le d'ainm, d'aois, an áit a bhfuil tú lonnaithe, grianghraf agus CV aisteoireachta.



# LÉAMH LE CHÉILE

Seoladh sraith físeán nua darbh ainm 'Léamh le Chéile' le gairid. Tá nasc ag an togra leis an tionscnamh Mo Leabharlann Bheag 2023. Acmhainn físe ar líne atá ann agus an sprioc atá ag 'Léamh le Chéile' ná tacaíocht agus cúnamh a thabhairt do thuismitheoirí níos mó léitheoireachta Gaeilge a dhéanamh lena ngasúir. Sna físeáin, tá leabhair scéalta Gaeilge á léamh ag an gcráoltóir Caoimhe Ní Chathail agus an láithreoir teilifíse John Sharpson. Tá 6 fhíseán sa tsraith, agus tá chuile scéal le fáil sna málaí leabhar Gaeilge atá i Mo Leabharlann Bheag i mbliana. Seo a leanas na leabhair a léitear sna físeáin: 'Bí ag Spraoi Liom' agus 'Beag Bídeach' scríofa ag Sadhbh Devlin (Futa Fata), 'Cócó an Colgán Cairdiúil' le hAilbhe Nic Giolla Bhrighde, 'Míp agus Blípín' le Máire Zepf, 'Ó Chrann go Crann' le Caitríona Hastings (An tSnáthaid Mhór) agus 'Percy Péacóg' scríofa ag Gemma Breathnach (Futa Fata). Is féidir teacht ar na físeáin ag an nasc seo:

<https://www.youtube.com/watch?v=OzWgSiiGddM&list=PLXb682lHqY-3GvCFfcqEjn9S5WfaC8Tf&index=6>



## MO PHEATA

Tá Fíbín sa tóir ar aisteoirí óga le bheith mar chuid dá gclár nua 'Mo Pheata'. Le suim a léiriú ní mór físeán 30 soicind a sheoladh chuig [eolas@fihinmedia.ie](mailto:eolas@fihinmedia.ie) nó ar WhatsApp chuig 085 138 9582, áit a thugann tú cur síos fút féin, le do pheata ann. Gasúir idir 8-12 atá ag teastáil agus glacfar le hiarratais go dtí Dé hAoine 25 Lúnasa.